

左恪靖侯奏稿初編

恪靖奏稿初編卷十目錄

請將克復金湯龍蘭及肅清浙東郡縣出力人等獎敘摺

奏報迎剿竄夥股匪獲勝收復夥縣情形摺

剿辦奇田土匪事竣首犯就擒緣由片

甯關洋稅動撥有由俟浙西肅清再行解京片

浙師援江獲勝江境肅清回徽防剿摺

附陳石太無糧可擄賊難久踞情形片

嘉義粵勇潰散請將貽誤提督革職拏問摺

請將援剿遷延之將備革職分別查辦片

奏報克復甯波慈谿等府縣并請獎敘鎮海出力人員

摺

外國官兵助剿出力請酌賞物件片

請卹上虞縣殉難紳士片

秋審人犯請展來春補辦并解由巡道勘審片

陳明浙海關循照成案扣足接徵摺

請將罵賊不屈之監生議卹片

請將克復金湯龍蘭及肅清浙東郡縣出力人等
獎叙摺

奏爲遵將克復金華湯溪龍游蘭谿及肅清浙東各郡
縣出力員弁兵勇請

旨獎敘以勵戎行事竊臣於同治二年二月十六日欽
奉二月初一日

上諭左宗棠奏攻克湯溪龍游蘭谿三縣及金華府城
一摺其餘在事出力員弁兵勇著左宗棠查明保奏欽
此又奉二月十九日

上諭左宗棠奏官軍克復紹興桐廬府縣城池一摺其餘出力各員弁兵勇著左宗棠併入克復金華等城案内奏請獎叙該部知道欽此伏查該逆以全力踞守金華而以龍蘭湯三縣爲犄角圖阻官軍進攻之路臣軍與劉培元一軍八月卽進圍龍游蔣益澧一軍將壽昌縣城及蘭湯各要隘攻克後卽進圍湯溪劉典一軍截剿援賊進規蘭谿數月以來各將士奮攻城壘日有傷損逆賊糧盡援絕希圖他竄復經各軍四面兜剿將三城先後克復首逆李尙揚李國羣就擒餘皆授首無一

名漏網金華相繼而下乘勢將武義永康義烏東陽浦江諸暨桐廬等城克復紹興蕭山之賊聞風竄走浙東遂一律肅清各將士奮力攻剿連克各城實屬異常出力臣欽奉

諭旨當卽恭錄行知各營除楚軍由臣詳核外其蔣益澧所部湘軍劉典所部克勇劉培元所部安武軍水師及湖南精捷營江西平江長左兩營俱陸續開摺請獎前來臣覆核無異合無仰懇

天恩俯准將單開各員給予獎敘出力稍次者由外記

名咨部註冊至節次打仗陣亡員弁併請

飭部分別議卹以慰忠魂理合分別繕單恭呈

御覽再蔣益澧所部有由廣西潯州案內擬保尙未出
奏者此次俱照擬保官階從優請獎合併聲明伏乞

皇上聖鑒施行謹

奏

同治二年七月十四日

議政王軍機大臣奉

旨另有旨欽此

奏報迎剿竄夥股匪獲勝收復黔縣情形摺

奏爲石太股匪竄入黔縣官軍迎剿獲勝現籌辦理情形恭摺仰祈

聖鑒事竊劉典一軍赴援景鎮會合江西各軍將崇光渡陶溪渡石門等處賊巢肅清後敗黨回竄石埭太平與原屯各股合隊往來窺探時圖乘間復犯徽境旋據道員王文瑞稟報六月十六日僞奉王古逆僞朝將江逆朱逆等率黨萬餘人竄至郭村十七早卽由羊棧嶺樟嶺竄入黔縣勢甚剽疾王文瑞隨卽約會分防九

橋魚亭各營於是夜四鼓出隊往剿十八日辰刻行抵
離縣城數里見城上旗幟林立遠近村莊皆爲賊館王
文瑞急令各營分三路進擊張聲恒率右營副右旗丁
長勝率老湘右翼王明輝率老湘後營由左路進朱明
亮率桂營賀章彬率老湘左營由右路進王文瑞督喻
勝榮鄧榮達率老湘前營右翼營及親兵由中路進我
軍甫成列該逆蜂擁出犯王文瑞麾隊迎擊鎗礮齊施
賊稍却喻勝榮鄧榮達乘勢猛撲熊常富復從村後抄
襲賊驚走我軍遂由大南門小南門奪關直入斃賊百

餘復追殺出城適左路朱明亮等率馬隊衝殺而來復斃賊百餘名時右路之賊憑從前官軍舊壘丁長勝等屢擊不動張聲恒分兵繞出賊後喻勝榮等又自中路馳至賊眾紛潰正掩殺間而後路盧村際村宏村等處之賊復分道上援玉文瑞令各營整隊迎敵鏖戰良久朱明亮丁長勝等仍於左右抄擊賊勢不支遂大敗走我軍三面齊進鎗礮刀矛並舉賊屍枕藉拋棄軍械旗幟塞道追奔二十餘里沿途復斬殺數百名是夜卽駐黟城十九日早王文瑞復督各營追出羊樓嶺外僅斬

尾賊百餘名餘黨已奔歸石太老巢是役共斃賊千餘
名生擒三百餘解散亦于計奪騾馬三十餘匹鎗礮旂
幟器械無算當將縣城克復嶺內仍就肅清該逆自上
年盤踞院南每思就食江西且以牽動金陵浙江官軍
之勢屢受重創狡謀未已現在黃李各逆竄擾湖口都
昌江忠義李榕兩軍雖屢得勝仗尙相持未下劉官方
等逆徘徊於彭澤建德之間尙思乘間奔突浮景防務
未能稍鬆必俟江西拓清徽防穩固劉典王文瑞之師
始可別圖進取臣惟有仍飭各軍協力防剿以全大局

而紓

聖廬所有浙軍迎剿黟縣獲勝情形謹會同協辦大學士兩江總督臣曾國藩恭摺由驛具

奏伏乞

皇上聖鑒訓示施行謹

奏

同治二年七月十四日

議政王軍機大臣奉

旨另有旨欽此

議政王軍機大臣 字寄同治二年八月初二日奉

上諭左宗棠奏石太股匪竄入黟縣官軍迎剿獲勝並
奇田土匪滋擾剿辦事竣李鴻章奏水陸官軍攻毀太
湖賊營進逼蘇城並進攻江陰各軍連獲勝仗踏平附
城賊壘其松江嘉興交界之楓涇鎮賊壘亦爲官軍攻
破各摺片本日業將剿辦奇田土匪及攻毀太湖等處
賊壘情形明諭宣示所有奇田案內奏請獎効各員並
進攻江陰陣亡之總兵賴榮光等均照所請分別獎懲
並交部優卹矣沈葆楨前奏掃清黟縣復馳奏都湖賊
匪被剿遁去江境一律肅清曾經明降諭旨宣布並將

出力之江忠義等各員分別獎賞寄諭曾國藩左宗棠
沈葆楨以由江境遁走之賊被剿窮蹙謀欲遁回石太
再從徽屯以窺婺源樂祐逆盤踞建德眾尙數萬飭令速
派江忠義等卽由江境跟蹤追擊以剿爲防並江石太
等賊一律掃盪乘勝東下左宗棠卽飭劉典一軍出羊
棧嶺會同剿擊毋令闖入徽境左宗棠此次奏報迎剿
竄夥賊匪各情與沈葆楨前奏大畧相同而拜發在沈
葆楨陳奏江境肅清之前此時江忠義當已進紮東流
將彭澤餘匪掃除進剿遁回石太之賊劉典之軍入徽

後亦可出嶺會同剿擊以清皖境仍駐徽防以與浙軍相爲援應池防穩固此股由江回竄之匪不得肆其竄突東征各路之軍方無後顧李榕江忠義兩軍將此股敗匪殄除之後並即可乘勝東下歸會國荃調遣以厚兵力著曾國藩左宗棠仍遵前旨妥速辦理一面咨照沈葆楨仍嚴督江省各軍及地方文武嚴密守備毋稍懈弛李鴻章偕同李朝斌自滬至蘇巡歷布置太湖大缺口各賊營已破程學啓各營進逼蘇城之婁門葑門江陰進剿之劉秉璋等各軍亦將城東北門外之賊壘

攻奪所辦甚爲得手蘇城雖大而賊勢旣威程學啓一
軍逼其東南李鶴章劉銘傳等軍規其西北李朝斌水
師往來遊擊足資得力現在官軍已分路進至江蘇膠
地曾國藩當檄飭進攻金陵之軍迅速合圍左宗棠卽
可檄飭由富陽進剿諸軍銳意進取牽制賊勢俾蘇州
江陰等城或有一處得手則江浙全局必能日有起色
日昨僧格林沁之軍已將紅山賊巢攻破白蓮池教匪
悉數殄除卽日移軍東昌與劉長佑等直東各軍進剿
宋景詩一股諒亦可冀剋期肅事唐訓方臨淮之軍爲

苗逆所持極爲危殆亦經僧格林沁飭令新請歸降之
總兵陳國瑞率領所部赴援或尙不致後時曾國藩接
到前次疊寄諭旨亦必知臨軍危殆妥籌兼顧矣奇由
土匪辦理尙爲妥速浙東新復各屬地方奸宄藏匿恐
尙不少著左宗棠隨時嚴查飭令各屬於撫輯之中妥
爲搜捕毋使伏戎潛行滋蔓將此由六百里各諭令知
之欽此遵

旨寄信前來

剿辦奇田土匪事竣首犯就擒緣由片

再本年三月間黃岩縣屬奇田地方土匪徐景朋黃得根等恃險聚眾擄掠婦女燒燬民房並於三桐橋一帶豎旗立寨又勾結太平縣匪目徐大度王明光等爲應援四月十五日署台州知府韓承恩署同知希慶署太平營參將瞿先仲台州衛守備張銘馨及已革前杭州協副將王邦慶等先後到黃分紮各處要隘正擬會剿二十一日該匪忽傾巢出犯王邦慶希慶等倉卒爲賊所乘紛紛敗潰希慶力戰死之先是臣接韓承恩告急之稟請調兵勇二千人知其意在要功而王邦慶張銘

磬尤非可用之人一面飛札嚴飭一面飭署溫處道周
開錫商令護理溫州鎮黃載清署鎮標遊擊謝復雲督
帶所部往剿詎黃載清等甫至而王邦慶等已經率眾
敗臣恐賊勢日張釀成巨患隨飭都司楊應龍率忠勇
軍五百人助之一面嚴飭各營併力攻剿以期迅速肅
事六月初三日黃載清督同各營分路進攻該逆恃地
勢奇險負嵎不出楊應龍督勇先進謝復雲繼之該匪
穴壁環開鎗礮花翎都司衛守備張招銀中鎗陣亡勇
丁死傷者數十人各勇益憤奮力齊進遂將巢穴攻破

斃賊百餘名餘黨衝出者復被各營圍剿殆盡並將村莊樹木一律焚化首逆徐景朋失其窟穴逃至太平旋經拏獲就地正法奇田以平竊查台郡各屬負山瀕海民俗强悍匪類最多而黃巖太平濱海之區尤爲匪藪以剽掠爲生涯以戕官爲故事惡習相仍由來已久地方官專事姑息有類養癰自髮逆竄擾以來匪黨乘機煽亂刦搶焚殺靡所不爲上年紳團克復各城經臣嚴飭該府縣將地方積惡棍匪嚴密擒斬雖陸續正法數千人而根株盤互旣久一時未能淨絕卽上年出力紳

國亦有著名巨棍竄附其中陽附嚮義之名陰懷報復之實事後論功紛紛爭執甚且互相械鬪結黨相攻置飭府縣秉公核保迄無定議此民俗之敝急須得人整理也此次奇田土匪拒捕戕官署台州府知府韓承恩先事漫無準備事發一味張皇署黃巖縣知縣劉蘭馨稟報軍情諸多掩飾無非爲攘功卸罪地步居心尤屬巧詐相應請

旨一併革職以示懲儆其最爲出力之都司楊應龍應請以遊擊補用署溫州鎮標遊擊謝復雲應請加參將

銜以昭激勸至署台州府同知乍浦同知希慶都司銜
守備張招銀力戰捐軀殊堪憫惻應請

飭部照例議卹所有剿辦奇田土匪事竣首犯就擒各
緣由理合附片陳明伏乞

皇上聖鑒訓示謹

奏 同治二年七月十四日

議政王軍機大臣奉

旨另有旨欽此

同治二年八月初二日內閣奉

上諭左宗棠奏剿辦奇田土匪事竣擒獲首犯正法等語本年三月間浙江黃巖縣屬奇田土匪徐景明等恃險結寨抗拒官軍經左宗棠嚴飭各營分路進剿六月初三日都司楊應龍督勇先進該匪穴壁環開鎗礮守備張招銀中鎗陣亡各勇奮力齊進遂將賊巢攻破斃賊百餘名餘匪紛紛出竄復經各營圍剿殆盡匪首徐景明逃出至太平旋經拏獲就地正法剿辦尙屬認真仍著左宗棠嚴飭各屬將地方積惡棍匪嚴密拏辦勿令勾結滋擾以靖地方浙江署台州府知府韓承恩於

奇田土匪滋事先事漫無準備事發一味張皇署黃巖縣知縣劉蘭馨稟報軍情諸多掩飾居心尤屬巧詐均著卽行革職以示懲儆其尤爲出力之都司楊應龍著以遊擊補用署温州鎮標遊擊謝復雲著賞加參將銜陣亡之署台州府同知乍浦同知希慶都司銜守備張招銀力戰捐軀殊堪憫惻均著交部照例議卹欽此

甯關洋稅動撥有由俟浙西肅清再行解京片

再浙江甯波府新關第三結至第七結止徵收洋稅銀三十八萬九千三百五十七兩一錢二分六釐除扣交

英法兩國各二成銀一十五萬五千七百四十二兩八錢五釐四毫其餘徵存銀兩例應解部因咸豐十一年浙省軍務喫緊需餉浩繁經前撫臣王有齡札飭前關道張景渠將新關徵存洋稅隨時解省並無存留甯波克復史致諤接任後又值逆氛逼近籌辦防剿水陸兵勇添募萬餘人新復之區無從籌措不得不將關稅暫撥應用茲准戶部咨開以此項洋稅並未奏明動撥實屬不合應請將已革關道張景渠現任關道史致諤交吏部照例議處其子稅半稅洋藥等項仍令於新徵稅

銀項下提還解部以充京餉等因伏查前革道張景渠任內經徵洋稅除扣還英法兩國各二成外餘悉解省充餉史致謬接任正值防剿喫緊不及奏報先將洋稅動用均因時勢急迫非尋常擅行動用者可比除飭令張景渠史致謬各將本任內動撥銀數趕造清冊送部查核所有此次應議職名可否寬免之處出自

天恩至嗣後徵收洋稅本應照例解京惟甯紹中外防軍月需餉銀六七萬兩

臣

所部浙閩粵各軍月需餉銀

三十萬兩而各省協項報解寥寥前由曾國藩撥歸

臣

軍江西河口景德樂平婺源等處釐金一款業經曾國藩咨開於本年六月初一日起仍撥歸江皖處頓失此的餉已覺拮据其廣東釐金一款本係專濟皖浙軍營上年及本年春間尙每月撥解二萬兩自晏端書接署總督後數月以來未據報解其閩海關協餉每月向解五萬兩現欠解十餘萬兩而耆齡接任後尙僅解過三萬兩兵增餉缺較前倍形支絀而一切軍火米糧近來俱由甯波採辦卽將洋稅一款截留亦不敷甚鉅若再提還解部則籌辦更難必致立時饑潰臣非不知京

師爲根本重地待餉孔殷惟就現在浙省情形而論則
實有未能照例起解者一俟浙西肅清餉源稍裕必當
悉數解京斷不敢藉詞留撥自干咎戾理合附片具陳
伏乞

聖鑒訓示謹

奏

同治二年七月十四日

議政王軍機大臣奉

旨該衙門議奏欽此

浙師援江獲勝江境肅清回徽防剿摺

奏爲浙師援江大獲勝仗江西全境肅清仍回徽境防
剿恭摺馳

奏仰祈

聖鑒事竊劉典援江一軍將崇光渡陶溪渡石門等處
賊壘攻克後卽飭黃少春楊芳桂率馬步軍六營進紮
梅源橋江西屈璠一軍進紮章由渡席寶田一軍及仁
右營進紮洋塘韓進春一軍進紮陳家嶺探稱該逆仍
踞上下彭及青山橋蕭家嶺等處其僞堵王祐王金王

等肅集湖口與江忠義李榕兩軍相持未退劉典以賊
竄湖口恃有上下彭青山橋之賊援應若不速圖攻剿
則彭澤湖口都昌等處秋稼登場必盡爲賊掠剿辦益
形棘手隨與江西席寶田顧雲彩兩軍於七月初一日
分路進剿青山橋賊巢劉典率各營攻其左席寶田顧
雲彩兩軍攻其右乘賊不備奪卡而入該逆驚惶失措
分兩路竄走官軍亦分路追殺十餘里斬賊二千餘名
生擒五百餘名解散酋從無數奪獲牛馬二百餘隻時
上下彭之賊率隊來撲經劉典督親兵及仁右營擊退

又斬馘百餘名餘賊均竄赴祁建交界之王家村彭澤
之賊退竄馬當古牛嶺都湖之賊退竄彭澤境惟上下
彭等處尙有賊踞初四夜席寶田顧雲彩督隊進剿大
破之偽祐王李遠繼率死黨來援復經後路接應之師
擊敗斬馘千餘名各逆紛紛下竄都湖等處一律肅清
查該逆糾黨十餘萬由池建竄至江西浮梁鄱陽縣境
距景德鎮僅廿餘里妄冀闖入腹地掣動全局經各軍
迭次痛剿退竄都湖猶欲力圖抗拒及劉典會同席寶
田等將賊之後路青山橋等處肅清始悉數竄斃現江

忠義李榕兩軍已分道跟追諒可得手惟迭據生獲賊
供該逆有仍圖由徽竄江之計現在江防無事劉典一
軍已取道回徽俟審酌賊蹤趨向卽當相機進剿以期
迅掃餘氛所有浙師獲勝江境肅清仍回徽州防剿各
緣由理合恭摺由驛馳
奏伏乞

皇上聖鑒訓示施行謹

奏 同治二年七月二十八日

議政王軍機大臣奉

旨另有旨欽此

附陳石太無糧可據賊難久踞情形片

再正拜摺間欽奉七月初五日

寄諭以賊竄江西都昌湖口彭澤等處軍情喫緊飭令
派軍會剿跪聆之餘祇悉小醜跳梁上煩

聖慮愧悚曷勝伏維逆賊之由皖竄江一則就食米糧
充足之鄉一則掣動皖浙大軍之勢其謀雖甚狡詐然
都昌鄱陽彭澤湖口各地境北阻長江西臨鄱湖南隔
昌江皆有水師防禦賊鼠竄其間三面皆水實亦自趨

絕地惟江西之浮梁及安徽之黟祁可爲旁竄之路安

徽之建德石埭一帶可爲退竄之路臣於劉典援皖之

始屬其嚴扼嶺路以保徽休黟祁如賊竄江西則力保

浮梁以杜紛竄追後則令其扼浮北建德之衝以要其

歸路而擊賊勢亦形勢所在不得不然也劉典會從臣

用兵江皖於地方情形較爲熟習又兼以善審地勢故

轉戰而前幸免隕越也至於石門青山橋諸戰則出其

不意斬賊實多賊憚後路之塞故退竄亦速江西之所

以一律肅清者以江忠義遮之於前而諸軍要之於後

足以制賊死命也現據探稱賊意仍欲由石太修帶竄入嶺內亦有謂其將趨廣德以赴金陵之援者臣維石太一帶無糧可擄賊難久踞能逼其下竄廣德以重兵扼之則徽甯之防可固卽浙師攻取湖州亦較易得手臣惟當隨時會商會國藩飭令各軍相機圖之理合附片具陳伏乞

聖鑒謹

奏

同治二年七月二十八日

議政王軍機大臣 字寄同治二年八月十五日奉

上諭左宗棠奏浙師援剿獲勝江西肅清籌辦石太股匪並臺灣粵勇潰散請飭林文察辦理該處軍務及現辦延平順昌土匪各摺片本日已降諭旨將護水師提督吳鴻源革職拏問護叅將吳連陞革職留營効力矣臺灣土匪滋事日久吳鴻源所統兵勇數已不少不能於嘉義解圍以後迅圖攻剿輒於南靖莊等處頓兵數月致該匪得預爲準備追賊守禦旣堅又不知分兵別覓間道相機兜剿以致師老財匱勇丁譁潰賊氛益肆猖獗實屬調度乖方業經明降諭旨將該員革職拏問

仍著左宗棠徐宗幹確切查明如有別項貽悞情形仍據實奏明參辦毋稍徇隱林文察既籍隸臺灣熟悉情形卽著該署提督揀調得力將士渡臺聯絡紳團將該處匪徒殄滅並著左宗棠徐宗幹催令林文察趕緊起程毋稍延悞應需餉項卽飭福建藩司於撥浙餉內酌量撥給延平順昌土匪僅數百人剿捕兵勇不下數千該統兵官任其回竄星橋老巢蔓延永安連城邵武歸化等處一味遷延不遵調遣業經左宗棠將吳連陞等分別咨參懲辦守備張連飛著於提省後嚴行訊辦按

律定擬並責成曾憲德督率各軍將延汀等處上匪尅期殲除不准再事稽延致干重咎江西全境肅清已據沈葆楨曾國藩先後奏報左宗棠現報情形與曾國藩等所奏大畧相同此股賊匪非復竄江西卽回趨廣德前經疊諭曾國藩沈葆楨飭令江忠義等諸軍乘勝進規池太並諭左宗棠飭令劉典督率各營由徽境之羊棧嶺馳往會剿此時江忠義等諸軍定可追賊人皖著左宗棠仍遵前旨辦理務令徽郡各營與江忠義諸軍聯絡聲勢前截後追將池太股匪就地殄除毋任蔓延

旁竄是爲至要滬軍現已攻克江陰蘇州嘉興等城攻
剿正在喫緊賊勢漸戚左宗棠當檄令蔣益澧等軍攻
賊要害使賊兼顧不遑當更有一二處可以得手將此
由六百里各諭令知之欽此

嘉義粵勇潰散請將貽悞提督革職等因摺

奏爲嘉義粵勇潰散請將貽悞之護提督革職等因並
請速飭林文察辦理臺灣軍務恭摺仰祈

聖鑒事竊自臺匪倡亂以來卽經奏調護理福建水師
提督吳鴻源總兵曾玉明副將會元福各帶兵勇赴臺

剿辦吳鴻源原統水陸兵勇三千餘名嗣在臺灣又添募廣勇屯兵二千一百名兵力不爲不厚乃自嘉義解圍之後並不迅圖攻剿頓兵南靖莊二重溝者數月致逆匪得預爲準備竹圍礮櫃既難力攻自應堅築營壘留兵以與賊相持而分兵別覓間道相機克剿以孤賊勢乃仍襲攻堅之策日以出隊攻撲爲事師老而賊益無所憚致五月廿七日攻撲南靖莊之粵勇一千名藉詞口糧久欠譁然潰散其時賊匪乘機攻撲各營兵丁亦多傷亡逃逸嘉義一帶賊氛猖獗道路梗阻雖據道

府稟吳鴻源以力攻南靖莊不下憂憤成疾致有此挫
然始則遷延不進繼則調度乖方實難辭咎相應請

旨將護水師提督吳鴻源革職拏問以昭儆戒臣維臺

灣一郡遠隔重洋居民多係漳泉及廣東占籍每村輒
築土圍栽植薊竹日久根株盤互有礮堡之固而無修
築之勞鎗礮丸彈不能飛入縱火不能延燒地脉肥饒
擅山海之利以故恃險恃富易肇亂萌從前平臺之役
往往剋期蕲事蓋及其初起急與芟夷故民志定而賊
勢孤也茲則官軍相持已久銳氣潛消又遠隔重洋餉

需難以按期接濟逆賊反得負固而乘其敝臣查署陸路提督林文察籍隸臺灣內山尙稱能戰其弟林文明上年從軍告假回籍亦稱勇敢該署提督前聞臺灣之變卽請回籍練團助剿合無仰懇

天恩卽令該署提督酌帶本標得力弁兵數百名渡臺號令舊部并統令各軍克期攻剿以靖海疆其林文察未赴臺之先令其先飭林文明預將舊部挑選以待庶期一鼓作氣克利戎機臣非敢謂平臺非林文察不可特以昔時用客兵而今則不能不藉土人之力以賊勢

蔓延既久非初起之寇可比也既用士人則不能不用
巨紳管帶取其情性相習易於聯絡招撫也林文察由
實缺總兵署提督令其統領各軍事權歸一又師行其
鄉地勢人情皆所熟悉似於局勢爲宜至閩省餉需近
爲浙省所累時有拮据之虞臣當飭福建藩司將援浙
餉項內酌撥若干暫資臺餉發交臺灣道文給愚昧之
見是否有當謹會同福建撫臣徐宗幹恭摺具
奏伏乞

皇上聖鑒訓示施行謹

奏

治二年七月廿八日

議政王軍機大臣奉

旨另有旨欽此

同治二年八月十五日內閣奉

上諭左宗棠奏請將貽誤之護提督革職等因一摺護
埋福建水師提督吳鴻源前經左宗棠調赴臺灣剿匪
統帶兵勇數千餘名自嘉義解圍後並不迅圖攻剿頓
兵南靖莊時逾數月糜餉老師五月二十七日所部廣
東勇丁一千名藉詞積欠口糧登時嘩潰致逆匪得以

乘機撲營兵勇亦有傷亡實屬遷延貽誤調度乖方吳
鴻源著卽革職拏問交左宗棠確訊各情從嚴參辦並
著左宗棠飭林文察等軍剋期進剿將臺灣府屬南靖
莊等處踞匪悉數殲除以靖海疆欽此

請將援剿遷延之將備革職分別查辦片

再延平順昌土匪自上年肆擾以來卽經署延建邵道
曾憲德派同知趙均都司祝鑒嵩督帶兵勇分投剿辦
本年三月間逆首李阿四率黨數百人由歸化竄至將
樂之白蓮地方復回竄順昌曾憲德稟請護理邵武營

參將吳連陞募勇千名赴順援剿前督

臣

耆齡復命遊

擊白瑛將撤回臺勇挑選數百名馳赴延平歸會憲德
調遣詎料李逆復由順昌將樂回竄星橋老巢蔓延至
永安之安沙清流之嵩溪其連城邵武歸化縣境亦均
被匪竄擾似此數百游匪任其豕突狼奔前無截擊之
師後無追剿之卒而所調兵勇不下數千坐失事機實
堪痛恨若不從嚴懲辦何以申軍律而儆效尤茲查該
參將吳連陞當賊回竄星橋之時一味遷延抗不赴調
經會憲德迭次移催始令守備張連飛督帶三隊勇丁

赴順而張連飛復任意推諉不遵調遣除已將該守滿
咨部斥革提解閩省查辦外相應請

旨將護邵武城守營參將吳連陞一併革職仍責令留
營效力其延汀等處土匪應卽責成曾憲德督率各軍
剿辦如再貽悞定將該道將等
奏請從重治罪是否有當伏乞

聖鑒訓示謹

奏 同治二年七月廿八日

議政王軍機大臣奉

旨另有旨欽此

同治二年八月十五日內閣奉

上諭左宗棠奏請將帶兵遷延之護參將軍職留營等語福建土匪李阿四竄擾順昌將樂等處經護理邵武營參將吳連陞帶勇援剿當賊回竄星橋之時吳連陞一味遷延抗不赴調實屬罪無可逭吳連陞著卽革職仍責令留營効力如再不知愧奮卽行從嚴懲辦欽此

奏報克復甯波慈谿等府縣并請獎敘鎮海出力人員摺

奏爲查明克復甯波慈谿鎮海奉化象山餘姚府縣各城並防守鎮海出力員弁兵勇紳團請

旨獎敘以昭激勸事竊甯波慈谿鎮海奉化象山郡縣五城於上年四月克復餘姚縣城於上年七月克復俱經前督臣慶端江蘇撫臣李鴻章先後奏報奉

旨交臣查明據實保奏在案竊維該逆竄踞甯波卽分黨圍攻定海妄圖盡佔沿海要區經釐定海鎮總兵袁

君榮督率兵圍將賊擊退已革護提督陳世章已革署甯紹台道張景渠飭遊擊布興有布良帶顧募廣艇乘勢攻取鎮海會合英法兩國兵船克復甯波慈谿其奉化象山兩城亦經民團收復嗣因餘姚爲甯波慈谿門戶張景渠陳世章等復添募壯勇召集民團會合洋兵於七月初七日將該縣新老兩城一律克復在事文武除布興有布良帶李光等所部師船於定海解圍後卽隨同攻克各城洵屬最爲出力應請擇尤獎敘其已革護浙江提督陳世章業經病故應毋庸議已革道員張

景渠已革甯波府知府林均等咨俟另行核擬外其餘
各縣紳董當兵餉兩窮之際或聯團助剿或募勇捐貲
均屬不避艱辛異常出力經臣飭令甯紹台道史致諤
覈實查明聽候保獎茲據史致諤彙案具詳前來臣覆
覈無異可否仰懇

天恩將單開各員給予獎敘其出力稍次者由外記名
咨部註冊以昭激勸理合開具清單恭呈

御覽伏乞

皇上聖鑒施行謹

奏
同治二年八月十二日

議政王軍機大臣奉

旨另有旨欽此

外國官兵助剿出力請酌賞物件片

再據甯紹台道史致諤稟稱上年四月克復甯波慈谿
餘姚各城外國官兵隨同助剿陣亡將領二人弁兵十
餘名俱奉

旨嘉獎該國官兵同深感激惟昨次接見洋人言及死
事各員既蒙

軫卹而現在打仗出力者可否仰懇

天恩酌賞玉器荷包等件俾得傳諸本國以示寵榮經
該道將迭次助剿最爲出力之英國領事夏福禮總兵
哇樂德克都司波格樂繙譯官有雅芝兵船醫官恭將
銜伊爾雲水師都司達費士法國參將德克碑稅務司
日意格教主田雷思等九員開列清單據情詳請前來
臣細加覆核上年克復甯波各城外國官兵實屬出力
惟由

內府頒賜奇珍恐褻

國體從前並無辦過成案可否請

旨嘉獎飭下

徵臣傳

旨賞給之處出自

聖裁理合附片具陳伏乞

皇上聖鑒訓示謹

奏

同治二年八月十二日

議政王軍機大臣奉

旨另有旨欽此

議政王軍機大臣字寄同治二年十一月十五日奉

上諭左宗棠奏克復甯波等府縣出力人員開單請獎
一摺本日已降旨均照所請獎勵矣另片奏英法領事
夏福禮等九員助剿出力請旨嘉獎並由該督傳旨賞
給物件等語英國領事夏福禮總兵哇樂德克都司波
格樂繙繹官有雅芝兵船醫官參將銜伊爾雲水師都
司費達士法國參將權授中國總兵官德克碑稅務司
日意格教主田雷思上年隨同官軍克復甯波各城實
屬奮勇出力宜加賞賚以示嘉獎各國助剿出力獎勵
有僅傳旨嘉獎者有行知各該國主自行給賞者有賞

銀牌者有賞銀兩者其功績大小不同故獎賞亦厚薄有別日前李鴻章奏克復蘇州省城戈登尤爲出力曾經降旨賞給頭等功牌並銀一萬兩聞此外另由李鴻章賞資銀七萬兩浙省助剿之英法領事等官夏福禮等九員協同克復甯波慈谿等城甚爲出力惟究非克省可比若賞給銀兩恐以戈登爲比實難爲繼若賞給物件過優恐戈登又有藉口緣日前陣亡之勒伯勒東曾賞貂皮英國駐京公使曾援以爲戈登請經總理衙門告知係因陣亡而賞戈登實非其比是以重賞銀兩

該使亦即終止左宗棠所請傳旨賞給該員等物件是
否已有成說惟未明言何項賞件礙難懸擬著將各該
員等勞績細加察覈應如何分別賞賚銀兩物件功牌
之處一面酌擬賞件頒發一面奏聞並摘錄此旨內嘉
獎數語宣示其或需賞給銀兩或需酌賞物件止須酌
定一項填註旨內至功牌爲外國人所重無論或賞銀
兩或賞物件均不可無功牌功牌如外國寶星之類崇
厚李鴻章並曾製造有式可仿照辦理也昨據李鴻章
奏克復無錫金匱該撫擬即日馳赴錫城籌佈進取令

程學啓等水陸各軍由平望太湖平湖乍浦兜剿浙省
之賊冀與浙軍前後夾擊昨已寄諭左宗棠督率各軍
與李鴻章聯絡策應並偵探忠逆所在實力剿截不可
令其潰圍逃逸諒能領會仍著凜遵疊次諭旨飭蔣益
漉等進克餘杭杭州與蘇軍會合併力嘉湖以收廓清
之效該督會否進紮富陽近日軍情並著隨時報聞以
慰廬系將此由五百里諭令知之欽此

請卹上虞縣殉難紳士片

再上虞縣紳士候選知縣陳景祺辦理本籍西鄉團練

咸豐十一年十月二十一日賊由諸縣竄陷上虞卽至
該縣擄掠陳景祺率團堵禦斃賊數名次日賊匪大至
團勇潰散被擒該員罵賊不屈賊矛指刺死之山陰縣
紳士候選光祿寺署正潘治安於紹興府城失陷後會
約紳士楊鳳藻募勇三千餘人於十月二十三等日攻
破白洋安昌錢清等處賊卡直逼蕭山旋因紹興蕭山
逆賊分路夾攻義勇潰散知潘治安倡率其事率黨至
伊村焚掠該員被執乘間赴水而死賊撈其屍復以火
炙之該二員死事情形最爲慘烈據代理紹興府知府

楊叔樸查訪確實詳司請卹前來可否仰懇
天恩將候選知縣陳景祺候選光祿寺署正潘治安交
部從優議卹以慰忠魂理合附片具

奏伏乞

聖鑒謹

奏同治二年八月十二日

議政王軍機大臣奉

旨陳景祺潘治安均著交部從優議卹欽此

秋審人犯請展來春補辦并解由巡道勘審片

再查定例應入秋審案犯於應勘時全數提省由臣督同在省司道會勘定擬具

題茲屆本年秋審省城未復臣督軍駐紮嚴州臬司劉

典調赴皖南剿辦逆賊勢難兼顧除浙江所屬地方甫經克復各縣無犯解勘外所有距省較遠之溫處二府所屬人犯向例解赴溫處道勘審其甯波府屬之定海縣衢州府屬之西安縣溫州府屬之永嘉瑞安平陽來順溫州府屬之龍泉慶元等縣應入秋審人犯可否籲懇

天恩俯准展至來春再行補辦並請援照道光年間海疆滋事案通章程就近解赴各該管巡道勘審以免疏虞據臬司劉典具詳前來除檄飭遵照並咨部查照外理合附片陳明伏乞

聖鑒謹

奏

同治二年八月十二日

議政王軍機大臣奉

旨著照所請該部知道欽此

陳明浙海關循照成案扣足接徵摺

奏爲浙海關前被賊擾循照成案扣足接徵恭摺

仰祈

聖鑒事竊照海關徵收稅銀向係連閏扣足十二箇月
爲一年期滿由關道詳請具

奏歷經遵辦在案茲浙海關自咸豐十一年三月初八
日起至同治元年三月初七日止爲一年期滿詎料咸
豐十一年十一月初八日逆匪攻入甯郡關隨城陷至
同治元年四月十二日克復卽於四月十八日開關啓

徵其空曠月日核計一百六十日分毫無徵以一年關期計之應補一百二十日伏查道光二十年六月間英咭喇兵船入浙經前撫臣烏爾恭額奏請將沿海口岸一體封港禁止商漁船隻出入關稅無徵迨兵船退出海關卽於十月啓徵請將封港日期扣除俟扣足一年期滿後具

奏奉部議准在案咸豐十一年十月髮逆佔踞甯郡至同治元年四月克復查該年關期自咸豐十一年三月初八日起至同治元年三月初七日止內除十一年十

一月初八日失守起至同治元年三月初七日止空曠
一百二十日應行補足外扣至同治元年八月十七日
止爲元年一年期滿相應援照道光二十年成案扣足
接徵循例具

奏至乍浦口自咸豐十一年三月初八日失陷頭圍口
於十一年五月十五日失守瀝海王家路二口於十一
年十月失守至今尙未克復其溫瑞二口亦因髮逆會
匪竄擾無徵之日較多應請統照浙海關開關日期辦
理以歸畫一而昭實合併陳明伏乞

皇上聖鑒施行謹

奏 同治二年八月十二日

議政王軍機大臣奉

旨該衙門議奏欽此

請將安徽罵賊不屈之監生議卹片

再代辦藩司署杭嘉湖道蘇式敬之姪蘇麟閣安徽監生在本籍辦理團練咸豐十一年十一月二十四日徽州之賊直撲長坂嶺蘇麟閣集團抵禦眾寡不敵團勇潰散罵賊不屈而死據該署道蘇式敬具詳請卹前來

臣覆核無異可否仰懇

天恩將監生蘇麟閣交部照外委例議卹以慰忠魂謹

附片具

奏伏乞

聖鑒謹

奏同治二年八月十二日

議政王軍機大臣奉

旨蘇麟閣著交部照外委例議卹欽此